

Jonathan Vieira:

‘Director nobo di Cas di Cultura lo mester bira mas creativo ainda den busca fondo’

ORANJESTAD — Director nobo di Cas di Cultura lo bay haya su mes cu e desafio grandi di busca fondonan di subsidio cultural y otro formanan di entrada, mirando con fondonan cultural di Aruba ta haya nan mes confronta cu cortamento di nan subsidio. Esaki director saliente Jonathan Vieira ta declara na Bon Dia Aruba.

“Loke mi a expresa cu board tabata elementonan mas importante cu mi ta wak cu siguiente directornan mester tin pa nan por maneha cas di Cultura, mirando cu tin masha hopi bezuiniging rond

den fondonan cultural, locual ta bay haci hopi dificil pa bin rond tur luna”, asina Vieira ta duna di conoce. “Desde cu mi a asumi cas di Cultura, ya caba na Hulanda nan a cuminsa cera tur e kranchinan di tur e fondonan cultural eyan. E ora a resta solamente fondonan na Aruba. Awo, segun mi ta compronde, di e fondonan na Aruba e presupuestonan ta bay wordo corta. Cas di Cultura cu ta depende di hopi fondonan pa proyectonan local por paga e huur y bin aki den na un huur minimal di 1500 pa 2000 florin, diripiente awor akinan tin un situacion na unda e fondonan no por apoya mes hopi di e proyectonan. Kemen cu Cas di Cultura mester bira mas creativo ainda den haya fondonan.” Na final, e contenido di loke Cas di Cultura ta ofrece mester keda un prioridad. “Sigur, cosmeticamente lo ta leuk pa bo pinta Cas di Cultura di oro mes, pero e cosnan mas importante manera zorg cu proyectonan keda drenta Cas di Cultura, pa bo keda inspira



y keda cultiva e hendenan, esey mester ta primordial”, asina Vieira ta conclui. Cu e ta na altura no tin bista ainda riba ken lo bay reemplas’e como director. Diabierna cu a pasa a tene un concierto y un recepcion di despedida pa Jonathan Vieira, cu tin planea pa bay muda pa New York na unda e ta bay traha como productor. Riba cua proyectonan e ta bay produci eyan, Vieira ta bisa cu e no ta na libertad ainda pa divulga. Loke si e ta indica ta cu e oportunidad aki a presenta su mes basta tempo pasa y cu ela indica na board di Cas di Cultura cu e lo por traha como director ainda pa 2013 pero cu pa 2014,

cerando su di tres aña como director, nan lo mester cuminsa busca un sucesor. Bon Dia Aruba tambe a publica diasabra ultimo cu Vieira ta hopi desapunta den minister Otmar Oduber y Aruba Tourism Authority (ATA) pa loke ta expresionnan haci door di e minister riba cancelacion di e subsidio pa Aruba International Film Festival (AIFF). Vieira ta bisa tambe cu for di New York e lo por paga debenan haci cu e concierto di edicion di 2012 mas lihe ainda. Tambe eyan e lo por busca patrocinadonan pa un posibel edicion di e festival fin di aña aki. □